

Augsburg, 21. Oktober 1575

An Theodor Zwinger

UB Basel, Fr. Gr. I 11, fol. 349r-v (nicht eigenhändig bis auf die Unterschrift und das Postskript).

S. Episcopi Augustani mors, cui D. Adolphus Occo nomismata sua destinarat, fecit vt Dillinganus Typographus inchoatum opus reliquerit.¹ Quòd si quis istic esset, quid suis sumptibus imprimere vellet: idem D. Adolphus reliquas chartas vnà cum praefatione, istuc mittere non recusaret: nihil precij postulans, nisi quinquaginta exempla, aut etiam pauciora, quae patronis et amicis distribuat. Eādem conditione etiam Plethonis et Cydonij libellos mittit: quos per puerum à nostrate mercatore dem Branger postules velim, et siue cum Oporinianis (è quorum officina annis abhinc viginti duobus prodierunt) siue cum alijs, agas, vt hac hyeme excudantur. Sin id à nemine poterit impetrari: libellos cum praefatione, eidem Brangero restituas: cui etiam codex iuridicus, Pithoeo missus, reddi poterit. Si verò illo diutius vti volueritis: syngrapha abs te D. Ioanni Baptistae Hainzeliomittenda erit: qua testeris, te librum illum primo quoque tempore, Augustanae bibliothecae sartum tectum velle restituere. Haec igitur sunt, vir clarissime, domine et amice colende: ob quae, praeter expectationem, et contra voluntatem meam, praeclaras occupationes tuas interturbare cogor. Sed magno meo commodo expertus sum, tibi labores, vt Achilli, quos propter amicos capias, non tam graues quàm suaves esse solere. quòd audacius etiam tua benignitate abutor: idemqùe molestè fero nullam mihi dari gratificandi tibi occasionem: qua data, me gratum et memorem experieris. Lucubratiunculas autem meas, de quibus per Pithaeum scripsi, varijs negocijs interpellatus, expolire nondum potui. Quod tamen, ἀν θεὸς ἐθέλῃ, hac hyeme fiet: Vt (si quis fortè vestratium typographorum eas imprimere non dignabitur) ad nundinas vernas Francofortum mitti possint. Vale, Augustae Vindelicorum, 21 Octobris. Anno 1575.

Hiero[nymus] Wolfius
Tuus.

Plethonem et Cydonium et locum Platonis, itemqùe Nemesij, censeo Latinè ordine excudendos, subiectis annotationibus. Deinde Plethonem, Cydonium, locum Platonis (Nemesij graecè describendi spaciū non fuit) seorsim Graecè adiungi: quòd commodius in scholis possint praelegi. Nam cum Latina et Graeca è regione collocantur: praeceptorum interpretatio à discipulis fastidiri solet, et ipsi praeceptores, ne nihil agere videantur, interpretes calumniari. Sed si typographus sola sibi Latina excudenda putarit (modò ne annotationes nostrae praetermittantur) et nos in eius voluntate acquiescemos. Sed profectò libelli sunt scholis utiles: in quas recepti, facilè distrahentur, saepius etiam (ut auguror) recudendi. Vale.

¹Von Wolf eigenhändig am Rand vermerkt: Chartae impressae, libellis adjunctae sunt.